

Personahe di Januari 2013

PIANISTA DEBORA HELDER TA HACI ENTREGA DI DONACION NA BIBLIOTECA NACIONAL ARUBA



YA casi ta dos decada pasa cu bou encargo di e.o. sr. Ido Yanes q.e.p.d., sr. Ito Tromp y sr. Emile Kelkboom, a yuda recauda fondo pa adkiri e Grand Piano di Biblioteca Nacional atraves di benta di CD di e Concierto di Siglo, cual na man di Padu Lampe, Norman Moron y Dominco Herrera a encanta amantenan di musica cu un biahe rond Reino Hulandes.

Y awe, danki n'e donacion cu New India Assurance Representative N.V. su Personahe di Calendario di Januari 2013, pianista Debora Helder, a haci na encargo di e empresa di seguro, e Grand Piano di nos Biblioteca Nacional ta ricibi su merecido atencion cu cual e por celebra di por cumpli cu su mihor posibel resolucionnan p'e aña

benidero. E hecho cu New India Assurance Representative N.V. ta cumpli mey siglo di existencia fructifero na Aruba y cu e calendario special produci p'e empresa di seguro awor a sali p'e di 15 aña consecutivo como obsekio di gratitud na nos pueblo y pa celebra potencial humano di nos comunidad, ta duna motibo amplio pa celebracion. Y manera sra. Joy Raghunath, Directora di New India Assurance Representative N.V. a expresa referente di esaki: "E mihor manera pa como empresa celebra bo gratitud pa tur bo bendicionnan, ta na prome lugar atraves di ta gradici den oracion tanto pa loke ta bon, como tambe p'e retonan cu ta ponebo crece.

Y loke ta sumamente importante ta pa semper bo corda duna bek cu loke bo por, pa sirbi de-

zaroyo y progreso di e comunidad cu ta brindabo e confianza di ta haci uzo di bo servicio y productonan."

E Calendario di Personahe ta habri aña 2013 cu e hoben pianista prometedor Debora Helder pa Aruba por ta consciente di e profundidad di nos gran potencial musical cual t'e cuna di e alegria sin igual cu ta haci nos e unico One Happy Island na henter mundo. P'e celebracion di e revelacion di e Calendario di Personahe na november ultimo, a transporta e Grand Piano di Biblioteca Nacional p'asina e resona bou di man di Debora den Crystal Theatre y eynan e piano tecnician responsabel pa bolbestem e instrumento despues di su transport, a detecta cu ya mester cuminsa upgrade e piano p'e no perde e resonancia colorido di su encanto.

Na momento cu sra. Astrid Britten,

Directora di Biblioteca Nacional a ricibi e bon noticia cu New India Assurance Representative N.V. lo obsekia e reparacionnan aki, el a keda hari so, sin sa mar con pa expresa su alegria.

"E piano aki ta di pueblo di Aruba," sra. Britten a remarca di forma entusiasma. "Y como pueblo nos merece di por tin un lugar caminda hende tin acceso pa practica tocamento di piano y tambe pa por disfruta di conciertonan atraves di un instrumento cu t'asina unico den tur loke e por brinda na profundidad musical."

Riba luna di Januari di e Calendario di Personahe por aprecia con Debora Helder ta comparti su alegria musical atraves di su asina yama SoulPainting y poema afirmativo cual den combinacion ta enfoca netamente riba continuacion pasiona di e revelacion di e persona su donnan y potencial humano.